

TARIKH	30 / 05 / 2014	SEKSYEN	
MUKA SURAT	24	RUANGAN	MEGA AGAMA

# Ibadah yang sarat manfaat

Fahami, hayati hikmah dan falsafah pensyariatan haji, pasti beroleh haji mabrur



TABUNG HAJI



BicaraHaji

Oleh DR. ZULKIFLI MOHAMAD AL-BAKRI

**A**LHAMDULILLAH, sedar tidak sedar kita sebagai umat Islam merasakan lambaian Kaabah sudah hampir tiba, ini kerana selepas Ramadan maka Syawal dikenali sebagai salah satu daripada bulan haji. Justeru, panggilan haji sudah pasti mengundang pelbagai persoalan kepada yang dipilih sebagai tetamu Allah SWT atau disebut sebagai *Duyuf al-Rahman*.

Tajuk yang cuba dibincangkan kali ini berkaitan dengan hikmah dan falsafah haji. Kemungkinan daripada artikel yang ringkas ini, tidak dapat untuk diperincikan satu persatu tetapi cukuplah penulis menyebut secara umum sebahagian daripada hikmah dan falsafah haji agar benar-benar difahami oleh kita semua.

Tatkala Allah SWT menyebut berkenaan dengan matlamat atau tujuan haji maka disebut dengan kalimat *liyashadu manafat lahum* yang membawa maksud supaya mereka menyaksikan banyak manfaat untuk mereka.

Syed Qutb dalam *fi Zilali Quran* berkata: Setiap generasi umat Muslimin dapat menikmati manfaat-manfaat itu mengikut keadaan-keadaan, keperluan-keperluan, pengalaman-pengalaman dan kehendak-kehendak masing-masing. Itulah sebahagian faedah-faedah yang dikehendaki Allah SWT ketika memfardukan ibadat haji ke atas umat muslimin dan memerintah Nabi Ibrahim a.s mengumumkan ibadat itu dalam kalangan umat manusia.

Perkataan manfaat didatangkan dalam bentuk *nakirah* dan jamak yang memberi erti amat banyak sehingga setiap orang akan mendapati pelbagai bentuk manfaat.

Sebahagian ulama membahagikan manfaat kepada dua iaitu manfaat dunia dan manfaat agama atau akhirat.

- **Manfaat dunia.** Antaranya seperti bidang perniagaan, transaksi kewangan, perhotelan, sewaan kenderaan dan tiket. Begitu juga dengan pelbagai bentuk perkhidmatan yang sudah pasti akan memberi laba dan keuntungan kepada yang pandai mengurus dan faham selok belok perniagaan.

- **Manfaat agama atau akhirat.** Seperti mana dinukilkan daripada Ibnu Abbas dengan maksud mendapat keredaan-Nya. Begitu juga kefahaman kepada kita cara yang terbaik untuk melaksanakan ibadat seperti solat dan lain-lainnya yang sudah pasti memberi banyak kelebihan kepada yang pernah melaksanakan ibadat haji.

Sekali lagi penulis meminjam kata-kata Syed Qutb yang menyebut: Ibadat haji merupakan muktamar untuk berkenalan-kenalan, bertukar-tukar fikiran, menyelaraskan rancangan-rancangan, menyatukan kekuatan, bertukar-tukar kebajikan, barangan, ilmu pengetahuan, pengalaman-pengalaman dan mengatur satu dunia Islam yang sempurna dan sepadu sekali setahu di bawah naungan Allah SWT dan berhampiran dengan Baitullah, juga di bawah ketaatan-ketaatan muslimin yang jauh dan dekat dan kenangan-kenangan indah zaman silam dan zaman sekarang di tempat yang paling sesuai dan dalam suasana serta waktu yang paling wajar.

Semoga sedikit falsafah ini memberi peluang kepada kita yang mendapat panggilan haji sebagai *Duyuf al-Rahman* untuk memahaminya serta dapat menghayati hikmah dan falsafah haji dengan sebaik-baiknya, sekali gus meraih haji yang mabrur.

## Hikmah dan falsafah

- Haji merupakan satu penghimpunan terbesar sesama Muslim yang terarah dan dipimpin melalui perlakuan, masa dan tempat yang sama dengan semata-mata menjunjung *manasik al-haji* dalam meraih keredaan-Nya.
- Menghidupkan serta menyuburkan halikat sebenar persaudaraan Islam serta menzahirkan dengan cara yang lebih realiti. Bertemu di Baitullah serta bermunajat dengan doa yang satu kepada Allah Yang Esa, sudah pasti semarak ukhuhah menjadi teguh dan kukuh.
- Terpancarnya nur tauhid ke pelosok alam yang menjadi simbol kesatuan umat Islam.
- Lambang kesamarataan dan persamaan taraf dalam kalangan umat Islam. Bahkan, pakaian ihramnya sahaja dapat menghilangkan rasa kegoan dan takbur.
- Merupakan sebesar-besar peringat untuk umat Islam kerana banyak tempat dalam pelaksanaan ibadat haji mempunyai sejarah berkaitan nabi dan rasul terdahulu.
- Setidak-tidaknya membawa kepada terbelanya fakir miskin yang berada di kota suci Mekah dengan rezeki yang dibawa oleh jemaah.
- Haji merupakan satu tarbiah secara fizikal dalam menempuh ranjau kehidupan dan menanggung kesukaran serta kepenatan, di samping mendidik kesabaran ketika menghadapi pelbagai perkara yang tidak di sukai.
- Menzahirkan rasa cinta kepada Rasulullah SAW dan para sahabatnya. Terutamanya ketika mengunjungi kota Madinah dan menzarahi makam baginda SAW.